

pulchro satis, Sinæ laminas illic marmoreas conficiunt, quod marmor illic à natura productum ita venulis, omnique colorum varietate adornatum est, ut montes, flumina, arbores, flores aliaque hujuscemodi ita referat, quasi erudita manu, penicilloque pictoris egregii ita isthic essent adumbrata: illo menfas, parietes, similiaque exornant Sinæ, Tiençang, à monte ex quo exscinditur, vocant. In hoc etiam terræ tractu ficus nascuntur Europeæ, quos Sinæ Vuhoaquo dicunt, ex eo indito nomine, quod nullo prævio flore ut reliqui fructus solent, crescat; *Vúhoa* enim sine flore significat, *quo* vero fructum. Cha etiam folia producit: & optimis piscibus scatet.

Montes.

Tiençang mons supra trecenta stadia occupat, est ad urbis occasum, undeviginti in eo altissimos numerant vertices, & aquæ stagnum tantæ profunditatis, ut nunquam in eo fundus sit repertus.

Strages hominum ingens.

Prope Chao civitatem est Fungy mons, ubi etiam ex congesta terra ingens collis visitur, sub quo supra ducenta hominum milia Regis Nanchao sepulta sunt, quæ in prælio cum Sinis habito fuere occisa duce Tangsienyuo, post quam victoriam Nanchao regnum ab Hana familia subactum est, quod quidquid ad Austrum est ultra Gangem complectitur.

Prope Tengchuen est mons Kiço multis ac magnificis idolorum fanis, ac sacrificulorum cœnobiis famosus, atque ex hoc loco idololatricæ Fe doctrinæ notitia prima ad Sinas pervenit: unde simul cum occupato regno devictæ quoque gentis sacra ac ritus suscepit Hana familia; cum antea Sinæ nihil nisi Xangti venerarentur, quod supremum sonat Imperatorem, multique valde probabiliter eos hoc nomine Deum explicasse volunt. Multos hic minoris nominis ac notæ montes transeo, sed nequaquam prætereundus vertex Tingfi in montibus Chao civitatis; hunc supra alios ad mille perticas eminere scribunt; ad radices castrum habet ad iterum custodiam.

Flumina.

Siul lacus primus occurrit, hic in amplam extensus longitudinem, incolas amœnissimo adspectu, ac copia piscium recreat, in eo montes tres sunt, qui tres faciunt insulas: sunt & aliæ quatuor planæ insulæ, atque admodum feraces: totus lacus novem Sinus, seu recessus ad interiora efformat; initium ad urbem Tali est, finem Langkiung civitas statuit; ex eo ortum ducit ingens fluvius Mosale, qui tota hac Provincia

superata in Tungking regnum irrumpit, magnaque ibi aquarum mole auctus, illum alveum efficit, per quem naves ad Tungking regiam tendunt.

Tertia Urbs

L I N G A N.

Habet Ligan urbs sub se civitates decem: 1 Ligan, 2 Kienxui, 3 Xeping, 4 Omi, 5 Ning, 6 Sinping, 7 Tunghai, 8 Hosi, 9 Siego, 10 Mungçu: & præterea munimenta novem, 1 Naleu, 2 Kiaohoa, 3 Vanglung, 4 Hiyung, 5 Kichu, 6 Suto, 7 Çoneng, 8 Locung, 9 Gannan. Hæc munimenta habet hæc urbs sub se præter morem communem, quia Tungking regno vicina est, & militaria præsidia non pauca illic alere cogitur Sinicus Imperator, ut Tungkingensium conatibus resistat, atque obviam eat. quidquid enim terrarum est ad ortum hujus urbis in hac Provincia, illud à rege Tungking occupatum fuit, illique paret.

Priscis temporibus Kiuting regni hoc fuit territorium; Hana familia, ubi illud sibi subjecit, Ciangho dynastiam hic fundavit; dein ad Mung regnum pertinuit, & hujus urbis locus Tunghai dictus est; Sunga familia Sieuxan vocavit; Juena urbem statuit, quæ fortissimis undique mœnibus cincta est, nec magnitudine contemnenda: ejus territorium partim diffusum in planitiem, partim collibus, montibusque extuberat: duos etiam magnos lacus includit, fluminibusque intersecatur; civitatibus, munimentis, oppidis, pagisque refertum est; oryza, tritico, melle ac cera abundat; fructus omnes totius Indiæ communes etiam producit. Vnum heroibus dicatum habet fanum, pontemque magnificum ad urbis Borealem partem, quem Tartari Juena familia construxerunt.

Vchung mons ad civitatem Omi est, qui tres attollit vertices, in quorum medio jacet civitas. Prope Ning civitatem mons est Vanglung, ab annosis pinis dictus. Prope Tunghai mons est Sieu, in quo fontem esse scribunt, cujus aqua epota sæpius carnem albam reddat, ac ad pinguedinem augendam gracilioribus mire conferat.

Prope Mungçu altissimus ac maximus mons est, Moce dictus, in quo viginti altissimos numerant vertices.

Puonchang mons Australem urbis partem tenet, hunc altissimum esse scribunt.

Prope

Montes.

Fons albedinem inducens, ac pinguedinem.